

1 JOWĀW

Jesus hã h'yy ka'eeh do hã pooj jé Jowāw ma erih do hahỹh

Ji h'yyb tym hed'ëep do ky n'aa hahỹh

1 Bë ãã ma erih hahỹh hã, sahõnh hẽ tadu dahäng do pooj jé hawät do ky n'aa, P'op Hagä Do Kyyh häd näng do ky n'aa.^a ãã maa napäh ta kyyh, ãã hapäh na-ãäj hẽ. Baad ãã bahapäh ãã matym me. Ta hã ãã moo däng. Ji h'yyb tym hed'ëep do ky n'aa né hẽ tii. ²Ji h'yyb tym hed'ëep do ana kãn ãã mahang.^b Baad ãã bahapäh né hẽ. Ti hyb n'aa ta ky n'aa ãã wén her'oot baad ub. Hedëb had'ytyt do ky n'aa bë ãã maher'oot. P'op Hagä Doo, ta Yb sii tabawäd wät. Ti ana kãn ãã mahang P'op Hagä Do an'oo bä. ³Bë ãã maher'oot ãã hapäh do ky n'aa, ãã maa napäh do ky n'aa, séd bë h'yyb hedoo hyb n'aa da ãã sii. Séd ãã h'yyb hedoo ta Yb hỹ pong jé hawät do hã. Séd ãã h'yyb hedoo na-ãäj hẽ ta T'aah hã, Jesus Kristo hã. ⁴Bë ãã wén ma erih hahỹh hã Jesus ky n'aa, tak'ëp ër tsebé hyb n'aa da.

Taw'ãäts hẽ ta bag hadoo doo gó ji bawät do ky n'aa hahỹh

⁵Bë ãã maher'oot ãã hã Kristo metëek doo. Hahỹh da tametëek ããh: Ta bag hadoo P'op Hagä Doo. Baad ub had'ytyt hẽ P'op Hagä Doo, tahanäng pé tii. Dooh badagyp pé ta hã. Tabad'op hẽ nesaa do ta hã, tahanäng pé tii. ⁶Ti hyb n'aa, séd hã ji h'yyb hedoo P'op Hagä Do hã ji her'ood bä, nesaa doo gó, badagyp do hadoo doo gó ji awäd had'ytyt bä, daap ji menyih tii bä ji her'oot do hã. Dooh baad hadoo do ky n'aa metëek doo da ji awäd bä tii d' ji edo bä. ⁷Baad ji aboo bä, P'op Hagä Do baad tabawäd had'ytyt doo da ta bag hadoo doo gó, séd ji h'yyb hedoo ta hã. Tii bä P'op Hagä Do awug hõm da sahõnh hẽ nesaa do ji h'yyb tym gó hanäng doo, Jesus, P'op Hagä Do T'aah majyyw me.

⁸“Tabad'op hẽ nesaa do hã yỹ”, ji noo bä, nesaa do ji jejën bä, ji daaj hẽ ji kawadii. Dooh tanyy bä ji h'yyb tym gó baad hadoo do P'op Hagä Do metëeh doo. ⁹Nesaa do ji h'yyb tym gó hanäng do ji najejën bä, P'op Hagä Do hã ji kawoow bä, tawug hõm da tii. Tamabaan hõm da sahõnh hẽ baad nadoo do ër moo bok do paah.

^a 1.1 Jesus Kristo ky n'aa né tii.

^b 1.2 Jesus né hẽ tii.

P'op Hagä Do anoo né hē taky däng doo. Dooch tahỹyd bä ta kyyh. Baad had'op do tii. ¹⁰“Dooch nesaa do ỹ moo wäd bä” ji ky hado bä, P'op Hagä Do noo kanesa, ji hanäng pé tii. Dooch tii bä ji h'yyb tym gó ta kyyh awäd bä.

2 Tah haa hedoo do bëeh. Bë ỹ ma erii wät tii, nesaa do bë moo nabok hyb n'aa, nesaa do bë hyb n'aa nanewëë hyb n'aa. Ti hado né paawä, nesaa do bë see moo wäd bä, nesaa do tahyb n'aa newë bä, ti anäng Jesus Kristo, P'op Hagä Do karën doo da hawäd up doo, ji ky n'aa rod n'aa P'op Hagä Do er Yb wë. Ji tamo n'aa jesuu. ²Jesus dajëp er hyb n'aa. Nesaa do er moo bok do sãm tadajëp, P'op Hagä Do awug hõm hyb n'aa nesaa do er hã hanäng doo. Dooch er hyb n'aa had'yyt tado bä tadajëp. Sahõnh hë badäk hahỹ hã habong do sa hyb n'aa na-ãäj né hë tadajëp.

³P'op Hagä Do ky n'aa jaw'yyk do ji ky daheeh do hã ji bahapäh P'op Hagä Do ji hapëë däg bä ji h'yyb tym gó. ⁴“Ỹ hapäh P'op Hagä Do hëp ỹỹ gó” hanäng péh, dooch ta ky n'aa jaw'yyk do taky dahé bä, daap hë ti tamenyyh taheer'oot do hã. Dooch ta h'yyb tym gó tanyy bä baad hadoo do P'op Hagä Do metëeh doo. ⁵P'op Hagä Do ji ky dahé bä, taheer'oot doo da ji awäd bä, baad tabadäng tii bä ji h'yyb tym gó P'op Hagä Do kamahän doo. P'op Hagä Do kamahän doo da ji kamahän kãn tii bä. Hahỹ hã ji bahapäh séd ji h'yyb hedo bä P'op Hagä Do hã: ⁶“Séd ỹ h'yyb hedoo P'op Hagä Do hã”, ji ky hado bä, taw'ääts hë Jesus bawäd wät doo da ji bawät.

⁷Najis haa, dooch papuuj ky n'aa jawyk do bë ỹ ma erii bä. Ta paa né hë bë ỹ ma erih, Jesus hã bë h'yy ka'eeh bë du do noo gó bë gadoo doo, bë hã rama metëek do paa né hë tii. Bë maa napëë wät do né hë ta ti bë ỹ ma erih doo. ⁸Ta paa né hë paawä, papuuj hado däk hahỹ ky n'aa jawyk do bë ỹ ma erih doo. Papuuj däg ji hapäh Kristo bawät doo kä, bë babok doo kä na-ãäj né hë. Bë eréd hõm nesaa doo. Bë du do däk baad bë babok doo kä. Nesaa doo, ji h'yy gatamah do na-ãäj hë badoo wät hỹ kã. Baad hadoo do ganä däk er h'yyb gó.

⁹“Ta bag gó ỹ bawät”, hanäng péh, ta da hadoo do Jesus hã h'yy ka'eeh do wë tah'yy gaëej bä, badagyp do hadoo doo gó tabawät nä tii. ¹⁰Ta da hadoo do Jesus hã h'yy ka'eeh do kamahän doo, ta bag hadoo doo gó tabawät. Dooch ta hã hanäng péh baad nadoo do hã ta hã h'yyb tatuk doo. ¹¹Ta da hadoo do Jesus hã h'yy ka'eeh do wë h'yy gaëenh doo, badagyp do hadoo doo gó ta h'yyb bawät.

Badagyp do hyb n'aa, nesaa do hyb n'aa, dooh tahapëë bã tahahôm hênh. Ty tamah do hado dâk.

¹²Tah haa hedoo doo, bê ÿ wén ma erih nesaa do bê h'yyb tym gó hanäng do P'op Hagä Do awug hóm do hyb n'aa, Kristo ër hyb n'aa dajëp do hyb n'aa. ¹³Bê mahang báp peej dâk Kristo hã h'yy ka'eeh doo, wahëh hedo padëëk bëeh. Bê ÿ wén ma erih, hedëb had'yyt do bê hapëë däg kân do hyb n'aa bê h'yyb tym gó. Bê mahang papuuj nä Jesus hã h'yy kae dâk doo, wanehëh nä do hadoo bëeh. Bê ÿ wén ma erih, Nesaa do Yb hã bê j'aa et'ëëk do hyb n'aa. Bê ÿ ma erih, tah haa hyb n'aa hedoo doo. Bê ÿ wén ma erih ër Yb hÿ pong jé hawät do bê hapëë däg kân do hyb n'aa bê h'yyb tym gó. ¹⁴Bê mahang báp peej dâk Kristo hã h'yy ka'eeh doo, wahëh hedo padëëk doo, bê ÿ wén ma erii wät hedëb had'yyt do bê hapëë däg kân do hyb n'aa bê h'yyb tym gó. Bê mahang papuuj nä Jesus hã bê h'yy kae dâk doo, wanehëh nä do hadoo, bê ÿ ma erii wät, bê h'yyb hej'oonh do hyb n'aa, P'op Hagä Do kyyh bê tah'yyb mahûüm do hyb n'aa, Nesaa Do Yb hã bê j'aa ketsë do hyb n'aa.

Dooh ji kamahän bã badäk hahÿÿ hã hanäng do ky n'aa hahÿÿh

¹⁵Bê kamahän manä badäk hahÿÿ hã habong do P'op Hagä Do hã h'yy kana'eeh do rakamahän doo. Bê kamahän manä badäk hahÿÿ hã hanäng doo. Jé badäk hahÿ kamahän doo, dooh P'op Hagä Do takamahän bã. ¹⁶Sahõnh hë badäk hahÿÿ hã hanäng do nesaa doo, tak'ëp ji h'yyb säg karën do hedoo doo, ji matym me ji heg'ääs doo, tak'ëp ji karën do hedoo doo, ji ma hã, ji moo wät do hã ji kasab'ee do hedoo doo, ti sahõnh hë dooh P'op Hagä Do ër Yb hanaa tado bã. Badäk hahÿÿ hã tabana tii. ¹⁷Badäk hahÿ gawatsik da. Ta hã hanäng do nesaa do hadoo do ji h'yyb karën do gawatsik né tii da ênh. P'op Hagä Do karën do ky dah'eeh doo, dooh ragawatsig bã. Aboo had'yyt hë da.

H'yy kawareem do yb ky n'aa hahÿÿh

¹⁸Tah haa, edah ti noo gó sahõnh hë tagawatsik. Bê ky n'aa napäh, ti pooj jé Kristo majiï, Kristo hã h'yy kawareem do yb kasee. Da hë hajök Kristo hã h'yy kawereem do rakas'ee kân. Ti hyb n'aa ji hapäh, edah sahõnh hë gawatsik doo. ¹⁹Ër mahang né paawä rababok do paah, dooh né hë ër wób rado bã. Ër wób rado bã paawä, dooh paawä ër reréd bã ër mahang rababok doo. Ër mahänh rabahôm. Ti hyb n'aa, dooh ër wób rado bã ji hapäh.

²⁰ Bē hā Jesus Kristo anoo P'op Hagä Do Sahee bē tah'y'yyb mahūūm hyb n'aa. Ti hyb n'aa sahōnh hē bē bahapäh panyyg heh'äät doo, P'op Hagä Do metëeh doo. ²¹ Dooch bē ŷ wén ma erii bā bē nahapäh do hyb n'aa baad hadoo do ky n'aa. Bē ŷ wén ma erih, baad bē bahapëë dāk do hyb n'aa né hē baad hadoo do ky n'aa. Baad hadoo do ky n'aa bā naa nado noo kanesa doo. Bē hapäh né hē tii. Ti hyb n'aa né hē bē ŷ wén ma erih. ²² Baad bē ŷ maher'oot. “Jesus, P'op Hagä Do H'y'yyb Däng Do nado”, hanäng péh, daap menyyh do yb tii. Ti né hē nanäng bē ky n'aa napëë dāk doo, Kristo hā h'y'yy kawareem doo. P'op Hagä Do T'aah, ta Yb na-āāj hē h'y'yy kawareem do yb ty n'aa ges'y'yyk. ²³ Ta T'aah ty n'aa ges'y'yyk doo, dooh P'op Hagä Doo, Jesus Yb tahapëë bā. Ta T'aah gadoo péh, Jesus Kristo Yb na-āāj hē tagadoo.

²⁴ Ti hyb n'aa, taw'ääts hē bē ky dahé had'y'yyt hē panyyg heh'äät doo, p'ooj ub, bē du doo noo gó Jesus hā bē h'y'yy ka'eeh do bē maa napäh doo. Taw'ääts hē bē h'y'yyb gó tabaym panyyg heh'äät doo. Panyyg heh'äät doo, p'ooj ub bē maa napäh doo, bē h'y'yyb gó tayyw bā, baad bē enyyw bā, séd bē h'y'yyb hedo had'y'yyt da tii bā Jesus hā, Jesus Yb hā. ²⁵ Hahŷ ti ér hā Kristo ky n'aa enooh doo: Ér tah'y'yyb edëeb had'y'yyt hē, hŷ pong jé ér baboo had'y'yyt hyb n'aa ta pa.

²⁶ Ta ti bē ŷ ma erii wät, bē ŷ maher'oot hyb n'aa bē hā karēn wad'ii do sa ky n'aa hā. ²⁷ P'op Hagä Do Sahee bē hā Kristo anoo doo, baym bē h'y'yyb tym gó. Ti hyb n'aa dooh hyb n'aa ta see bē ma metëek péh. P'op Hagä Do Sahee ti bē tama metëek sahōnh hā. Baad bē tama metëek. Dooch daap tado bā. Ti hyb n'aa, taw'ääts hē bē ky dahé had'y'yyt hē bē tama metëek doo. Taw'ääts hē Kristo hā bē h'y'yy kata däg had'y'yyt hē.

²⁸ Hŷŷ kā, tah haa hedoo doo, ŷ ab'aanh bē hā: Kristo sii bē aboo had'y'yyt hē, tamatëeh bā kā, h'y'yyb neŷŷm gó ta matym gó ér bab'ëeh hyb n'aa, ér nu maneb'yyng hyb n'aa ta matym gó ér bab'ëeh bā. ²⁹ Bē hapäh do hyb n'aa baad had'op do ti Kristo, bē hapäh na-āāj hē P'op Hagä Do taah né hē sahōnh hē baad hadoo do moo bok doo.

P'op Hagä Do taah eër ky n'aa hahŷŷh

3 Bē hegāā nyy da tak'ëp ér Yb hŷ pong jé hawät do ér takamahän. Tak'ëp ér takamahän do hyb n'aa P'op Hagä Do taah ér tamaneëenh. Ti né hē eër! Badäk hahŷŷ hā habong do P'op

Hagä Do hä h'yy kana'eeh doo, dooh ër rahapëë bä P'op Hagä Do taah ëër, ranahapäh do hyb n'aa P'op Hagä Doo. ²P'op Hagä Do taah né hë ër da hë, najis haa. Dooh né paawä ër P'op Hagä Do metä nä bä nyy d' tabad'oo da ër hä, ër hapäh Jesus Kristo hado däk da ëër, tamatëeh bä, baad ub tii kä Jesus ër bahapäh do hyb n'aa ti noo gó. ³Sahõnh hë Jesus Kristo hadoo rabahadoo do sa h'yyb gó ragahëen doo, sa daaj hë rakan'yyh nesaa do mahãnh, Jesus baad had'op do hadoo rabahadoo hyb n'aa kä.

⁴Nesaa do moo heb'oooh doo, P'op Hagä Do ky n'aa jaw'yyk do wë rah'yy kawereem. Sahõnh hë nesaa do ji moo wät doo, P'op Hagä Do ky n'aa jaw'yyk do wë h'yy kawareem do tii. ⁵Bë hapäh né hë, Jesus bahyng wawëë hë nesaa do ji moo wät do tabado hõm hyb n'aa. Dooh nesaa do ta hä. ⁶Ti hyb n'aa Jesus sii hawät doo, dooh nesaa do tamoo hewëed bä. Nesaa do moo heb'oooh doo, dooh Kristo tahapëë bä ta h'yyb gó. ⁷Ti hyb n'aa, tah haa hedoo doo, bë hyb n'aa matakä bë ranawadii hyb n'aa. Baad hadoo do moo heb'oooh doo, baad had'op do né hë tii, Kristo baad had'op do hadoo. ⁸Nesaa do moo heb'oooh doo, Dijab^c karapee tii. Tii d' ji wén hapäh sahõnh hë tadu dahäng noo gó Dijab moo hew'ëët né hë ta ti nesaa doo. P'op Hagä Do T'aah ewäd hyng wawëë hë tagawatsiig hõm hyb n'aa Dijab moo wät doo.

⁹P'op Hagä Do taah dooh nesaa do ramoo hebo bä, P'op Hagä Do Sahee mahüüm do hyb n'aa sa h'yyb. Dooh rahaja bä nesaa do ramoo hebo bä, P'op Hagä Do taah rabahadoo do hyb n'aa. ¹⁰Hahÿy hä ji hapäh P'op Hagä Do taah, ji hapäh na-ãäj né hë Dijab karapee: Baad hadoo do moo nawät doo, ta da hadoo do Jesus hä h'yy ka'eeh do kamanahãnh doo, dooh P'op Hagä Do t'aah tado bä.

Ji da hadoo do ji kamahãnh do ky n'aa hahÿy

¹¹Hahÿ ti bë maa napäh do pooj jé bë du do noo gó Jesus hä bë h'yy ka'eeh doo: Taw'ãäts hë ji kamahãnh ji da hadoo doo. ¹²P'ooj ub hawät do Kaïh makū bad'oo doo da, bë adoo manäh. Nesaa Do Yb karapee né hë tii. Ta hÿyj tanabooh. Ta hÿyj Kaïh wén nabooh, nesaa do Kaïh moo hew'ëët do hyb n'aa. Ta hÿyj ti baad hadoo do tamoo hew'ëët. ¹³Ti hyb n'aa, wakãh haa, bë h'yy gabedo manä

^c 3.8 Gereg kyy me ramaneëenh Nesaa Do Yb, Dijab. “Ji taky n'aa tapa had'yyt doo”, tahanäng pé ti Dijab.

badäk hahÿÿ hã habong do P'op Hagã Do hã h'yy kana'eeh do bê wê rakawaj'ãän bã baad bê babok do hyb n'aa.^{d 14} Èër, dooh èr h'yyb tym dajëp do tahado wäd bã. Èr h'yyb tym edëb kãn P'op Hagã Do wê. Baad ta ti èr bahapäh, èr wakãän Jesus hã h'yy ka'eeh do èr kamahãän do hyb n'aa. Ta wakãän Jesus hã h'yy ka'eeh do wê h'yy gaëenh doo, dajëp do hadoo nä ta h'yyb tym. ¹⁵Ta da hadoo do wê h'yy gaëenh doo, dahej'ëep do hadoo ti P'op Hagã Do matym gó. Sa da hadoo do dahej'ëep do sa wê, dooh edëb had'yyt do awäd bã. Dooh P'op Hagã Do wê ras'ëeg bã. Bê hapäh né hê tii.

¹⁶Hahÿÿ hã èr bahapäh kamahãän heh'äät doo: Ta daaj hê Jesus Kristo kan'oo däk dajëb hã èr hyb n'aa. Ti hyb n'aa taw'ääts hê èr na-ääj èr kan'oo däk èr da hadoo sa hyb n'aa. ¹⁷Ji ma nyy bã, ji da hadoo do ta wê badoh do ji t'yyd manehiïn bã, dooh P'op Hagã Do hã ji kamahãän. ¹⁸Tah haa, ji kyy me had'yyt nado ji kamahãän. Taw'ääts hê ji masa doo me ji kamahãän ji wakãän Jesus hã h'yy ka'eeh doo. Taw'ääts hê ji kamahãän heh'äät, j'ooj madäk doo me nado.

¹⁹Baad ji wakãän ji kamahãän do hã, baad ji hapäh, baad hadoo do ky n'aa ky daheeh do ji. Baad ji wakãän ji kamahãän bã, dooh ji h'yyb eÿÿm bã P'op Hagã Do ji hyb n'aa es'ee bã. ²⁰Dooh ji eÿÿm bã ji h'yyb ji taky n'aa tapa bã paawä. Tii d' tawén hadoo, ji h'yyb tym bahãnh P'op Hagã Doo. Sahõnh ji h'yyb tym gó hanäng do P'op Hagã Do hapäh. ²¹Najis haa, ji h'yyb ji taky n'aa natapa bã, dooh ji h'yyb eÿÿm bã P'op Hagã Do sii ji er'ood bã. ²²Ta hã ji ky n'aa etsëe do ji gadoo ji hapäh tii bã, tamejüü do ji ky daheeh do hyb n'aa, tagen'aak do ji moo wät do hyb n'aa. ²³Hahÿ pawóp hê P'op Hagã Do ji tamejüü: Ta T'aah Jesus Kristo hã ji h'yy ka'eeh, ji da hadoo do ji kamahãän ji tamejüü doo da. ²⁴Tamejüü do ky dah'eeh doo, séd hã rah'yyb hedoo P'op Hagã Do hã. Sa h'yyb gó P'op Hagã Do bawät tii bã. Ta Sahee èr hã tanoo do hyb n'aa èr hapäh, èr h'yyb gó P'op Hagã Do bawät.

**Ji metyy P'op Hagã Do Sahee kyy gó tado
bã raheer'oot do ky n'aa hahÿÿh**

4 Najis haa, bê ky dahé manä “P'op Hagã Do Sahee kyy gó ÿ baher'oot”, hanäk doo. Taw'ääts hê bê mety ta tii, bê bahapäh hyb n'aa P'op Hagã Do Sahee tado bã sa h'yyb tym gó hanäng doo,

^d 3.13 Ji wê rakawajãän, Kaih moo ti ragahôm do hyb n'aa.

P'op Hagä Do Sahee tanado bä. Hajök badäk hahÿÿ hä ketyn h'ũüm P'op Hagä Do ky n'aa rod oow daap menyuh doo. ²Hahÿÿ hä da bë metyy P'op Hagä Do Sahee kyy gó tado bä rahe'oot doo: Aj'yy gó né hē Jesus Kristo P'op Hagä Do T'aah kesok se hub né hē hanäng doo, ky daheeh doo, P'op Hagä Do Sahee kyy gó né hē ti tabahe'oot. ³Aj'yy gó Jesus kesok do ky sēm doo, ky nadaheeh doo, dooh P'op Hagä Do Sahee kyy gó tado bä ti tabahe'oot. Kristo hä h'yy kawareem do yb sahee ti hedoo do h'yyb tym gó tabawät. Bë ky n'aa napäh, ti awät h'yy kawareem do yb. Ti awäd däg kän badäk hahÿÿ bä. ⁴Bë tah haa, P'op Hagä Do karapee né hē bëeh. Ta Sahee bë tah'yyb mahũüm doo, P'op Hagä Do hä h'yy kana'eeh do h'yyb gó hanäng do bahänh, Dijab bahänh. Ti hyb n'aa, bë h'yy ganyy däg nanäng ma matëg oow sa hä, bë wén ky nadaheeh rahe'oot doo. Bë j'aa etëëg wät sa hä. ⁵Badäk hahÿÿ hä habong do P'op Hagä Do hä h'yy kana'eeh do wób tii. Ti hyb n'aa P'op Hagä Do hä h'yy kana'eeh do ramaa napäh, raky daheeh rahe'oot doo. ⁶Dooh sa wób ër do bä. P'op Hagä Do karapee ër ti hÿÿh. P'op Hagä Do hapäh do maa napäh, ky daheeh, ër metëëk doo. P'op Hagä Do karapee nadoo doo, dooh ji tamaa newë bä. Ër her'oot do maa new'ëë doo, Sahee baad hadoo do h'yyb mahũüm. Ër her'oot do maa nanew'ëë doo, daap menyuh do yb sahee ta h'yyb gó tabawät.

Kamahän do ky n'aa hahÿÿh

⁷Najis haa, P'op Hagä Do banoo ër hä ji kamahän doo. Ti hyb n'aa, taw'ääts hē ji da hadoo do ji kamahän né hē. Ta da hadoo do kamahän doo, P'op Hagä Do karapee né hē tii. Baad P'op Hagä Do tabahapäh ta h'yyb gó. ⁸P'op Hagä Do kamahän had'yyt hē. Ti hyb n'aa ta da hadoo do kamanahän doo, dooh P'op Hagä Do tahapëë bä. ⁹Hahÿÿ da P'op Hagä Do metëeh ji hä ji takamahän: Ta T'aah sét had'op do tamejüü ër mahang, hÿ pong jé ji awäd had'yyt hyb n'aa ta hyb n'aa. ¹⁰Hahÿÿ heh'ääts kamahän doo: Dooh ji tado bä P'op Hagä Do ji kamahän doo. P'op Hagä Do ti ji takamahän. Ta T'aah tamejüü wawëë hē tadajëp hyb n'aa ji hyb n'aa, nesaa do ër moo bok do sãm, nesaa do ji h'yyb tym gó hanäng do tabawug hõm hyb n'aa ta T'aah majyyw me.

¹¹Najis haa, ta ti hadoo né hē P'op Hagä Do tak'ëp ji takamahän. Ti hyb n'aa, taw'ääts hē ji kamahän ji da hadoo do Jesus hä h'yy ka'eeh doo. ¹²Dooh noo gó P'op Hagä Do ji ty gepäh péh. Ti hado

né hē paawā, ji wakāān Jesus hā h'yy ka'eeh do ji kamahān bā, ji h'yyb gó P'op Hagä Do bawät tii bā. Baad tabadēē dāk tii bā ji h'yyb gó P'op Hagä Do kamahān doo. P'op Hagä Do kamahān doo da ji kamahān kån tii bā. Ji h'yyb tym gó P'op Hagä Do bawät. ¹³Séd ji h'yyb hedoo P'op Hagä Do hā, ji h'yyb gó P'op Hagä Do bawät ji wén hapäh, ta Sahee ji hā tanoo do hyb n'aa. ¹⁴Ta T'aah P'op Hagä Do mejüü wawēē hē, sahōnh hē badäk hahÿÿ hā habong do sa h'yyb tym dēēb tabahadoo hyb n'aa. Ti né hē āā hapäh āā matym me. Baad ta ky n'aa āā baher'oot. ¹⁵Ti hyb n'aa, “P'op Hagä Do T'aah né hē Jesus Kristo” hanäng péh, ky daheeh péh, ta h'yyb tym gó P'op Hagä Do bawät, séd tah'yyb hadoo P'op Hagä Do hā. ¹⁶Baad ér bahapäh P'op Hagä Do ér takamahān. Èr daab yyp P'op Hagä Do ér takamahān do hā. P'op Hagä Do kamahān had'yyt hē. Ti hyb n'aa, jé P'op Hagä Doo, ta wakāān na-āāj hē kamahān had'yyt doo, séd tah'yyb hadoo P'op Hagä Do hā. Ta h'yyb gó P'op Hagä Do bawät.

¹⁷Jesus Kristo bawät doo da ér babok badäk hahÿÿ hā. Ti hyb n'aa baad tabadēē dāk ér h'yyb gó P'op Hagä Do kamahān doo. P'op Hagä Do kamahān doo da ér kamahān kån P'op Hagä Do an'oo bā. Ti hyb n'aa, dooh ér eÿÿm bā Jesus ji taky n'aa etym noo gó. ¹⁸P'op Hagä Do ji kamahān bā, dooh ji eÿÿm bā. Ji eÿÿm mabaj näng do hā. Ti hyb n'aa, baad had'op P'op Hagä Do ji kamahān bā, dooh ÿÿm ji hā. Ji eÿÿm bā, dooh baad tadēē nā bā P'op Hagä Do kamahān do ji h'yyb gó. ¹⁹P'op Hagä Doo, ta wób na-āāj ér wén kamahān, pooj jé P'op Hagä Do ér takamahān do hyb n'aa. ²⁰“P'op Hagä Do ÿ kamahān” ji ky hado bā, ji da hadoo do Jesus hā h'yy ka'eeh do wē ji h'yy gaēēj bā, daap hē ji menyh tii bā. Ji wakāān ji hapäh do ji kamanahān bā, ny daa ji kamahān P'op Hagä Do ji nahapäh doo. ²¹Hahÿÿ da Jesus Kristo mejüü do paa ji: P'op Hagä Do takamahān doo, taw'āāts hē ta da hadoo do Jesus hā h'yy ka'eeh do takamahān na-āāj hē.

**P'op Hagä Do ji kamahān bā, tamejüü do ji
ky daheeh do ky n'aa hahÿÿh**

5 Sahōnh hē “Jesus né hē ti P'op Hagä Do H'yyb Däng Doo” hanäk doo, ky dah'eeh doo, P'op Hagä Do taah né hē tii. Ta yb kamahān doo, ta yb taah takamahān na-āāj hē. ²Hahÿÿ hā ji bahapäh P'op Hagä Do taah, Jesus hā h'yy ka'eeh do ji kamahān bā: P'op Hagä Do ji kamahān bā, tamejüü do ji ky dahé bā na-āāj hē.

³P'op Hagä Do ji kamahãñ bã, tamejũũ do ji ky daheeh. Nahejooj, ji nahajaa do nado P'op Hagä Do mejũũ doo. ⁴Sahõnh hẽ P'op Hagä Do taah rahajaa raj'aa etëeg bã badäk hahỹỹ hã habong do P'op Hagä Do hã h'yy kana'eeh do sa hã h'yyb tatuk doo. Jesus hã ji h'yy ka'eeh do hyb n'aa ji j'aa et'ëek badäk hahỹỹ hã hanäng do nesaa do ji h'yyb tat'uuk doo. ⁵Jesus P'op Hagä Do T'aah né hẽ ky dah'eeh doo, jããm né hẽ ti rahajaa raj'aa etëeg bã nesaa do hã badäk hahỹỹ hã habong do P'op Hagä Do hã h'yy kana'eeh do h'yyb karën doo.

⁶Jesus Kristo né hẽ ti wawëẽ hẽ hahyng doo, naëng me nu kemuun wät doo, ta majyyw tan'oo däk do ji hyb n'aa tadajëp noo gó. Nu kemuun wät do had'yyt nado tame. Dajëp na-ããj né hẽ. Tan'oo däk ta majyyw ji hyb n'aa. Baad P'op Hagä Do Sahee metëeh ji hã ta ti ky n'aa. Te hub né hẽ had'yyt hẽ P'op Hagä Do Sahee. ⁷Tamawoob hẽ ta metëe n'aa, te hub né hẽ Jesus ky n'aa metëeh doo: ⁸P'op Hagä Do Sahee, tanu kemuun do naëng me, Jesus majyyw tan'oo däk do tadajëp noo gó. Séd gó rametëeh. ⁹Aj'yy hapäh do ky n'aa taheer'ood bã, ji ky daheeh taheer'oot doo. Ti bahãnh ti P'op Hagä Do her'oot doo. Aj'yy her'oot do nado tii. Ti hyb n'aa, baad ji ky daheeh ta T'aah ky n'aa taheer'oot doo. ¹⁰P'op Hagä Do T'aah hã ky daheeh doo, tenãm ta h'yyb gó Jesus ky n'aa P'op Hagä Do metëeh doo. P'op Hagä Do her'oot do ky nadaheeh doo, P'op Hagä Do noo kanesa, tahanäng pé tii, ta T'aah ky n'aa P'op Hagä Do her'oot do taky nadaheeh do hyb n'aa. ¹¹Hahỹỹ da ta T'aah ky n'aa P'op Hagä Do metëeh ji hã: Ta T'aah hyb n'aa ji h'yyb tym tabed'ëep, hỹ pong jé ta sii ji awäd had'yyt hẽ hyb n'aa. ¹²P'op Hagä Do T'aah gadoo do ta h'yyb tym gó, hỹ pong jé had'yyt hẽ tabawäd däk da P'op Hagä Do sii. Ta T'aah ganadoo doo, dooh né hẽ tagado bã edëb had'yyt do P'op Hagä Do pa.

¹³Y wén ma erii wät hahỹ bë hã, P'op Hagä Do T'aah hã h'yy ka'eeh doo, edëb had'yyt do bë gado däk né hẽ, baad bë bahapäh hyb n'aa. ¹⁴P'op Hagä Do anoo ji hã ji etsëe doo, P'op Hagä Do gen'aa do hã ji h'yyb däg bã ji ky n'aa etsëe bã. Ti hyb n'aa dooh ji h'yyb eỹm bã P'op Hagä Do sii ji er'ood bã. ¹⁵Ji tamaa napäh ër hapäh. Ti hyb n'aa sahõnh hẽ ta hã ji etsëe do ji gado däk do hadoo. ¹⁶Ti anäng nasaa do p'ãã näng doo, dawëe ji bawäd hõm P'op Hagä Do mahãnh tanoo doo. Nasaa do ji wakããn moo wäd bã ji hapëe bã, p'ãã näng do tanado bã, taw'ãäts hẽ ji ky n'aa etsëe tii. Tii bã P'op Hagä Do anoo ta hã edëb had'yyt doo. Nesaa

do p'ãã näng doo, dawëë ji bawäd hõm P'op Hagä Do mahãnh tanoo do hyb n'aa nado bë ky n'aa etsëë, ÿ hanäng tii. ¹⁷ Sahõnh hë nesaa do ji moo wät doo, ji hyb n'aa newëë doo, baad nado né hë ti P'op Hagä Do matym gó. Ti hadoo né hë ti anäng nesaa do ji h'yyb gó tanyy bä, dooh tan'oo bä dawëë ji nu gadäk P'op Hagä Do mahãnh.

¹⁸ Èr hapäh, dooh P'op Hagä Do taah ramoo hebo bä nesaa doo, Jesus mo n'aa jesuu do hyb n'aa sa hä. Dooh Nesaa do Yb haja bä tarejä bä sa hä. ¹⁹ P'op Hagä Do karapee ëër, ër hapäh. Nesaa Do Yb mejüü sahõnh hë badäk hahÿÿ hä habong do hä, P'op Hagä Do hä h'yy kana'eeh do sa hä, ër hapäh. ²⁰ Èr hapäh na-ãäj hë P'op Hagä Do T'aah ewäd hyng, ji tah'yy ganä däk, P'op Hagä Do heh'äät do ji bahapäh hyb n'aa. Séd ër h'yyb hedoo P'op Hagä Do heh'äät do hä. Séd ër h'yyb hedoo ta T'aah Jesus Kristo hä. Ti ti P'op Hagä Do heh'äät doo. Ti né hë tanoo ji hä ta wë ji h'yyb tym edëb had'yyt doo.

²¹ Ti hyb n'aa tah haa, bë h'yy kae manä ta wób rah'yy kaha'eeh do hä. Jããm hë kä.